

زينب الشاذلى

معالى الروح

أشعار بالعامية المصرية

الطبعة الأولى يناير 2018

بطاقة الكتاب

المؤلف : معالى الروح
المؤلف : زينب الشاذلى
التصنيف : أشعار بالعامية المصرية
رقم الإيداع : 2018-4316
عدد الصفحات : 100 صفحة
رقم الإصدار الداخلي : 136
تاريخ الإصدار الداخلي : يناير - 2018 الطبعة الأولى
المراجعة دار النيل والفرات (فرع المنيا) : الشاعر جابر الزهيرى
جميع حقوق الطبع والنشر محفوظة للشاعر، ولا يحق لأى دار نشر
طبع ونشر وتوزيع الكتاب الا بموافقة كتابية وموثقة من الشاعر

دار النيل والفرات للنشر والتوزيع

سجل تجارى : 13242
بطاقة ضريبية : 165-5-00031-572-01-35
رقم التسجيل : 2017-7 544-662-202
E-mail: alnile waalforat@yahoo.com
twitter: النيل والفرات
youtube: alnile waalforat@yahoo.com
facebook: alnile wa alforat



هاتف : 01011256943 - 01116202218 - 01202541192

الشرقية - العاشر من رمضان - مجاورة ١٣ - عقار ٣٠٤ - الدور الثانى - أمام سنتر ١٣

الإهداء

بهديك يا ابويا الكلام

بهديكي يا أمي

دا انا حبر قلّمي

وانا بكتب الإهداء

ملّيته من دمي

زينب

ليه؟؟

طب ليه قفلت الباب

لما جابتنى ورودي

طب ليه عشانها

بتسيب وجودي

..... و الفضاء

على كل وسعه

نقطة في حيز حدودي

غاوي انجذاب

على طرف شالها

و الحضور اللي ف ملامحي

لو همس ... وحده هيبدد زمانها

انت فعلا غاوي جرحي

..... بس حاسب

إنت مهما كنت حبيب

إنت بالنسبالها واحد

ف القاموس

تاني فِكر ... تاني حاول

يوم تغوص

و ف عمق قلبي

ف الغرام أدبك دروس

و انت جاهل ف العلم

أما اعيد لغة اليمام

صوت الكمان محبوس

روح

روح

مش مجرد

مادة للكتابة

دي نبض

يا صاحب السعادة

..... و الوجود

روح

لأبعد نقطة ف المدى

برّة الحدود

و اسمع أنين الشوق

وقت الشروق

يعزف حنين العود

(عووووووود)

روح

دي مغنى

يوزن دماغنا

لكل معنى

يلمسك خد الورود

و إن كنت غاوي

توهب حياتك للخلود

..... يبقى سبيلك

روح

لحن حزين

وصفت بحرفك الباهر

بان اللوحة يا شاعر

..... وتر مشدود

على عود

بيغزف بس لحن حزين

لمعة عين

بتضوي أنين

و ابتسامة م الربيع

يتحنّى خضارها حنين

و مهما كتبت ف قصايد
و مهما نشرت من دواوين
ما وصفش حبرك
غير بعض
من كل الفروض ف العشق
بدايتها من فرضي
أبدر تقاوي الحروف
.... و شوف
ما بتساعهاش غير أرضي
اللوحة زاهية صحيح
مليانة بالألوان
.... و الشاطر
يا أيها الشاعر

اللي من بين الغيوم

بيفهم العنوان

و يفهم الباقيين

إن الوتر مشدود

على عود بيعزف

بس لحن ... حزين

بصراحة

إعلانك

إنها ماتت

مش كفاية

دوس عليها

و دوس كمان

هي تستاهل صراحة

احقن وريدها بالنيران

اركب حصان الغدر

و اجري

افرش غيطان الفل

و ارمي

بياضها بالسواد

عَلّق على عيدان البعاد

.... القلب خان

و هي تستاهل صراحة

ما اتعلمتش إن فيه شيء

اسمه الجراحة

و انت عامل ف النصاحة

.... ملكش زي

اضرب بفاسك فوق الزهور

و قول : دي بور

انكر إن النور

خط من عمرك سطور

هيم و قول

رتل حلول

روح الشهيد

دوس ع الوجود

اللي ملكته بحبها

.... بره الحدود

و هي تستاهل صراحة

سنابل شوق

جابلي سنابل قمح

هدية

أغلى حبوب

لمستها أيديا

بعد ما لمست إيدته شوية

هو دا مهري

و انت اللي اتأخرت عليا

حبة بتوصف

حبك ليا

أما التانية بتوصف ظلمك

لما بعدت بروحك عني

.... بس لعلمك

نبض عروقك مش بيسيبيني

دقة بتهدي الشوق للنني

و دقة تقولك

إنت مالكني

و ليه تحرمني العمر بطوله

رمش رميته

و لو هاتطوله

بحر حنان

مهما احكيك

نقطة بتكفي ترطب ريقك

شفت القمح

يا روعي إزاي
لما هداني القمر الجاي
شفت ازاي
حقق أمانيا
جابلي سنابل قمح هدية
أغلى حبوب لمستها إيديا
بعد ما لمست إيده شوية
هو دا مهري
و انت اللي اتأخرت عليا

روح الحب

عازرة أخرج

برّه حدود

كل الأشياء

تتراجع كل الأحاسيس

إلا الأشواق

أنا عازرة أنصب نفسي نموذج

للعشاق

و اوصف كيف الروح

تشتاق

و الذي يحب حقيقي

.... حقيقي

قلبه الهائم يبقى ملاك

يخرج برّه حدود المادة

وألّف مادة

توضح مادة

بتوصل روح الحب الشاردة

فوق الصمت

و حربه الباردة

و لما بيتلاقى الحبيين

بتدوب بينهم

أي معاندة

أول درس عشانكوا اتلخص

و انا مش أخصص
بكرة الدرس الثاني يشخص
مين العاشق اللي هاحرص
يعلا بروحه
لكونه ملاك

روح عشقاني

شغلتنى هموم الروح
أحزانها و أحزاني
..... كيائها
لما بيعشق
و يسبح ضي بكياني
كما المَهرة اللي أسراني
و نبض وريدها له صورة
بتعكس نبض وجداني
.... و أنا المجني عليه دائما
و أنا الجاني

و روح الشعر هوياني

و يكفاني القمر باليل

و ضحكة نيل

.... و حنّية

و شجرة لسه محنية

محنية بغنى المواويل

..... و ع المنديل

ودع رامي بياض ليا

أمل جاني

شجن بيهز ألحاني

هاعيش و حروفي تتكلم

و اموت

و الكلمة عاشقاني

الرحايا

و الرحايا

و الله كانت ناقصة حبة

من ضلوعي

دا انت أصلك

كيف دموعي

.....بتخترنها

بس لما بتنفلت

بتطيح بطوعي

.....لو مين

بييجي يمّها
بتسيل بحور من دمّها
لما بتصعب
يوم عليها نفسها
و تهيج قلو عي
ريح و ليل
و الموجة رافضة تستكين
و الحبل مشدود بالوتين
شعور سجين
أوعر غضب
هو اللي متكفّن
ف توب العاشقين

روحك مش ممكن تلقاني

جدا قاسي الحب عليا

مش مطاوعني

لا بيسمعني

لما بمد الشوق بإيديا

و لا بيساعني

لما تهيم الروح حواليك

مش دي أسيّة

طبع و لايق و الله عليك

تكرم كل طيور الغيّة

و أنا ملغية

انت أناني

و الحنية اتوسمت ليا

رحمة اتخلقت بس عشاني

و انا يكفاني

..... ظلمك فيا

روحك مش ممكن تلقاني

.... واهم جدا

.... عايش تحلم

قلّب صفحة حلمك تاني

..... أنا حبيتك

يمكن أيوا

أو ما انكرش

بس العرش
دا ليّا لوحدي
و انا ما اقبلش ف حبي شريك
مهما ابغيك
قلبي انا هاجي عليه
و اتنازل
لو تستاهل
كنت فرشت رموشي و نبضي
ورود تتمايل
على صوت خطاويك

رغم كذبك

نفسي أصدق

كل كذبك

كان مراية

بس قلبي انت بالنسبale

أصدق

انت سهران الليلا دي

بتعد كل نجوم حياتي

و حكاياتي

يا اللي خدني فيك تملي

ان شعرك صار يملّي
كل عاشق روح لضلي
انه فرحة
لسه باقية
هي رايقة
بس مدفونة بأهاتي
وحده صوتك
لو سمعته
برمي كل الكون ورايا
... أما لو شفتك حكاية
رغم كذبك
روح تحبك
رافعة فوق الرمش راية

براءة

يا اللي عيونك

فيها براءة

تكفي الكون

و ابتسامتك

شمعة بتضوي

و قلب حنون

او عى دموعك

تنزل أبدا

مهما يكون

كل الناس الحلوة دا هيا

فاردة إيديها
و جاية تصون
كل الأديان السماوية
قالت أبدا
مش هتهون
انت هدية
إن صحت جوانا النية
تمد العون
بيك تتهنى
و جوا الدنيا
نشوف الجنة
بأحلى عيون
يا اللي نبينا

زارع فينا

حبك ...

أجمل حس و لون

صباح سُكَّر

صباح الشمس بتبَدَّر
و تهدينا العبير سُكَّر
يحلي النور أمانينا
صباح المسك و الغبير
يهيم ف الروح و تتعطر
و بيجدد أمل فينا

تفاصيل الرواية

لوفيه كلام

يوصف ملامحي

... لو بدقة

توصف الرقة بعيوني

والا لوني

لوني قمحي

طرح نادر للبراءة

وانت قادر

تلقط الصورة بجرأة

تقرا صمتي

نسمة لو جرحت كرامتي

بالربابة تدور

تغني

تحكي عني

أما تفاصيل الحكاية

و الله آية

للي يتروى بحكايتي

انت بارع ف القصايد

قلبي لو رايد

يجيبك

مش يكفيك

و بإرادتي

أصل وردي عبيره نافذ

.... لو هاتقدر

..... هيم

..... و فكر

و ارسم الشوق اللي قايد

..... و الا اقولك

ما تغامرش

اسأل حروف الأبجدية

لما حاولت تحتويني

لما شافت

شوقي شارد

صرخت و قالت

ما احتملش
فما تحاولش
الوصف دا محتاج
رواية
رأيي فيها
م البداية للنهاية
البطولة للمشاعر

بقولها لك

سحبني الشوق على بابك

..... أروح

و تروح

أقربك

و انا المجروح

أبلى من نداك وردي

تجافي الروح

فيدبل م الربيع خدي

و تدفن فرحتي عمداً

و تعلن إنه لي نداءً

فقسماً

....ثم قسماً

بحق الشوق اللي دورته

على رقبتني

لتيجي ف الهوى

دايب

إلى عندي

ف عندي يدوب

و يفرد توب

يغطي مشاعري بالرقّة

عشان ما تروق

حنين وجدي

لهيب محروق

و كيف صدّك عليا صعب

و يحلاك

..... لكن بالك

منين ما تفوق

أنا هاخذ حقوق قلبي

بقولها لك

حنين الروح

جوابك

ع الجبين عّلم

حنين الروح

كدا سّلم

إذن شوقي بيستسلم

و شريان الهوى

طايح

بيهذي

أو بيتكلم

كلام رايح لسهد الليل

عشقت الأنة ف المواويل

كلامك شهده

كيف النيل

منين ما يروح

تلاقيني معاودة لك

رابطني الوحي بكتابك

يفوت ع الروح

يوشوشها

و يندهني الودع

مالك ؟؟

أقول للرمل عديني

لشط سقيته من عيني

..... لحضن بعيد

لكن ضله

مدفني

سرسية أحلام

أنا مجنونة بجمالك
و ادوب من وقفة قدامك
خطفت كياني من نظرة
فلو همسة
فما بالك؟؟
تصدق إن انا حاسة
لو الفرصة هاتسمح لي
أعلق روعي على بابك
أشاهد من بعيد حتى
تخبيني الحيطان حبة
تسرسبني بأحلامك

دا انا بس اللي باتمنى
أقضي العمر أستنى
و أنقش بالورود حنة
على كفي اللي بات بردان
و قلبك اللي حاسسني
لكن بخلان
هاولع من حطب أملئ
عشان يا روي تتدفي
سنين العمر مهما تطول
حياتك بيا راح تكفي
و لما يحين دبيب الموت
هاموت لكني
مش ندمان

تفاصيل روح

تفاصيل روح

و اتوزّعت

فوق الزمان

كان م المحال

إنه يصير إنسان

و بريشة مجنونة

لملمني قلبك الهيمان

خلع صمتي

.... من الصورة

و صار بركان
بالي اللي كان رايق
مش عشان فرحان
بس نمل م الوجع
و الجدع
لما بيتحمل وجع
بيمثل إنه
عمره ما بات زعلان
و قلت ادندن
ع الكمان
قالوا : كمان
دا البحر هاج
و اتوصى بالقبطان

و رماه بسفينته بعييد

و اتهدت الشيطان

أنا قلت بس أعيد

جوايا ترتيب الكلام

و أهى عدت المواعيد

و لا عادشي حد ما لام

و الباقية جوا الروح

يا دوب

حبة غرام

جمرة

مسيرها تقيد

و تبدد الاحزان

و بريشة مجنونة

لملمني قلبك الهيمان

خلع صمتي

من الصورة

و صار بركان

عزف

و الكمان

لما بيعزف

يرتعث صوت الحنان

و الندى

يرخي الستائر

يخطف البال اللي داير

فوق خدود الورد

بان

غصن بان

و اللي متخبّي ف ضلوعه

قلب له

ريحة زمان

و الجنان ف الحب آن

من عينيك

و الا من لمسة إيديك

عندها يقف الكلام

روحي تتوضى الهيام

و الحقيقة

باعترف لك

اسمي معنى للغرام

كان لازم

كسر المرأيه

فتش الشروخ

عزى جروح الروح

نزف الوريد م القلم

و انا أصلي ابن الألم

موصوم بإحساسي

و انا الفاكِر

و مش ناسي

.... أتوه بين موج

و له أشعار
و قطر وطار بلا سواق
و متشعبط
و آخر حنة ف المشوار
ما شوفتش مين حواليا
و كان من اللازم جداً
تشد على نفسي شوية
بس الطفل يموت
ف الجري
و بتسبيه الحنية
و انت يا شاعر
طاوعك قلبك القادر
تعصر بالحزام جامد

و لو يبكي و يتشاهد
و بيشاور و بيعاند
عاوز له درس ف الإلزام
لكن بالوعد
و بالقيد اللي لفيته
على الرقبة بحد الحد
يروض ف الغرام قلبه
يحف اللي انطرح ع الأرض
و اللي زاد ف مشاعره
و يبقى تمام
و لما يقابل الأستاذ
تعظيم سلام
يا شاعر

سحقاً لجنونك و جنوني

حطمت قيودي و هاتحرر

هانصب عودي

و اعزف حرفي

بلحن خلودي

انا مش هأكتب

تاني عشائك

انت خلاص من بره حدودي

انا مش بابكي

دي الفضة بتغزلها خلودي

رمشي اتهدب

مش راح يحلم

قلبي اتعلم

مش يتسحب يمة حبك

سارق شوقي

مهما اتعذب

هاعلن موتي

لوف كلامي

أوف سكوتي

ألمس سيرتك

هاحرق صورتك

لولسه بتسكن ف عيوني

روح ما اتخلقتش عشان تبكي

سحقاً لجنونك و جنوني

صوت الأمان

الله أكبر

هو ذا صوت الأذان

صوت الأمان

اللي جمعنا كلنا

الله أكبر

رحنا لبينا النداء

و ف كل خطوة تهزنا

الله أكبر

و زلزلت قلب العدا

دم الفدا

دم الشباب الصامدين

الله أكبر

رفرفت على كل دين

ورد الجنينة اللي طرح

على أرضنا يشهد لنا

صوت الجوامع والكنائس

و السنين

الله أكبر

ع الجبين الحق راجع

صوت أنين

أمن علينا و صوته راع

الله أكبر

ردت قلوبنا بالخشوع

و الرب سامع الله أكبر

الموت حياه

عرش مصر

فوق دماغها

و الشهادة التي دمعها

الموت حياه

فرحة طارت ف السما

سبقته بتسجد للإله

ربي علّمها ف كتابه

يوم وجعها

تقول دموعها

لا إله إلا الله

الصبر

الصبر

طالع فجر

خلي القلق ع الرف

رق الكلام ف الحلق

جرف المشاعر جرف

شهدت قلبي

و علمي

دمه ما بطل نرف

أنا كنت عنتر زماني
بارع ف لضم الحرف
وقع الكلام مني
شارد و ف النني
دم الشهيد ما جف
انا بابكي ف احضانكم
و الحزن فاق الوصف
قلب العرب واحد
يكفي الإله شاهد
إيد الخسيس عادت
تقطف ورودي قطف

و الله زمان

كان ياما كان

روح الزمان

عدت على شجرة لمون

..... صدفة

سحرت عيون كل الزهور

و الفل هام

عارفين عشان

صحت ديبب ذكرى

لما انزرع آخر الجنينة
ما رضى يش ينالم
و اتسندت كل الجذور
على بعضها ف ضل الحيطان
عايزة تروح لها
لجل ما تفتح رموش الشمس
همس العبير ملا المكان
من عطرها
و لا عادش يشرب
إلا من ريق الحنان
اللى اتخلق على كفها
..... و أما راحت
فضلت عيدان الفل توفي

لضلها

لما ف يوم

آن الأوان

عدّت عليه

روح الزمان صدفة

كتب الندى

و الله زمان

آاااه يا أمي

الفل لما بببتسم

يرسم جمالك

و النخيل بضافيره وطّي

يمسح الآه عن زمانك

انتي يا حبي الحقيقي

لو حروفي تبات تصلّي

بين إيديكي

عمري ما هاوفي احتمالك

لما جربت الأمومة

و شلت هم الكون بحاله

لما جرب قلبي يبكي

حال وجوده

و ارتحاله

لما ينزف من حنانه

لما يضمنيني يا أمي

بعد ابني

وروحى مشتاقه لجنانه

بفتكر ساعة ما سيبتك

طائرة أحلامي معايا

قد إيه يومها أمتك

دايسة بطموحي الحكاية

آآآآه يا أمي لو تسامحي

لو يكن تمنه دمايا
جاني صوتك
زي حلم بعيد حلمته
و ارتعش احساس بعيني
لما شفته
قلتي
يكفي يا حبيبتي
لو سنين العمر ترجع
بهدايا لك بالسعادة
و مستعدة
أدفع العمر و زيادة
فوق شبابي
و لا المح في عينيكي

دمعة تلمع
ربي وزع للرضا
أبواب كثير
برّك يا أمي
و بضمير
بالأخير
هو بابي للعبادة

و تبكي عيني

تبكي عينيا الدار

لما شوقي دار

و اتغربلت أسرار

وقعت على جروحي

حبة بلون مهجتي

حبة بلون النار

اللي كوت روي

كوني برد و سلام

كوني التنام الوجع

ليه بتنسي
إن الجدع
عشق منك دفاكي
..... و لون الشمس
يكفاكي
الدرس واعر قوي
علم على قلو عي
ما منعكيش ترقصي
و عشت فيكي
تحرسي
نبضين على ضلوعي
و إديتيني الأمان
ليه جمر ك الخوان

يتمرد

على طوعي

ما كفاكيش

انك سييتي العاشقين

و كتبتى مرك ع الجبين

و نبشتى بركان الحنين

و فردتى البحر

بدموعي

انا مش مسامحك يا نار

طبع الزمان دوار

و هادفك حقي

نغم

(١)

سحرتك بالنظر ليا
و لمعة بتضوي ف عينا
و لو لحظك لمح قلبي
تلاقي الورد ف الموكب
عبير و اتلف حواليا
و هامت بيك فراشاتي
لأنك مني و إليا

(٢)

أيوا يا شاعر

دندن بوح

إرمي الشيلة

و اعرف ع القمر ليله

و كفاية

سنينك بتروح

قلب مجمد

لكن شيفاه بوضوح

و اما المزيكا تغني

تتسر سب من صمت الروح

تكتب قلبك ف النوتة

و بمعنى الصدق المفتوح

..... تكتب

روح

(٣)

لما يتوَلَّف كلام

يحكي عن روح الغرام

يبدر الإحساس تقاوي

للي غاوي يعيش أمير

تدلى عناقيد الغاوي

و تهدي نسمة للهجير

ممکن يرق القمر

و يحن للتعبير

و النبض يبقى عبر

تهز قلب الطير
و تحقق الأحلام
لما يتولف كلام
يحكي عن روح الغرام

(٤)

روح .. تتوه فيها العقول
تسرقك علشان تقول
وانت بتغنيلها شاي
حزمتين م الحمول
ارمي واحده عن يمينك
بعتر التانيه ف طريقك
وامشي خالي م الهموم

عمر روح ما طرحش لوم

والل عاش على ضلها

.....يبقى يضلها

فرعين أمان

لوم الزمان

لسه فاضلها

لو حتى يوم

(٥)

للروح سمات

اللي يتآلف ما بينها

اللقا يرسم جبينها

.....والحروف

سكنت ف جوف

اتعتق بالسكات

مش كتير

لما يبقى للميتين تعبير؟

بس والله مش كتير

الورد لما يموت

بيسيب العبير

ف الحقيقة هيا روح

لكن اتظلمت كتير

(٦)

روح مش شاطره

لكن حاصل رأيك فيها

دائما عشره

هيا يا دوبك

مشيت حبه

وقالوا زمان

أن العشرة تاريخ ومحبة

لكن رغم انك وحداني

طبع الرقة وعمق الطيبة

ليك وحداني

مش راح أكون جواني

.....واقولك

إن الشعر اللي اتعلمته

منك صادف

أغلى أمانى

(٧)

روحي إكسير الحياه

سرّها عند الاله

اللي يحسن ..و يلاطفها

ترمي طيفها

طوق نجاه

.....يااااااه

لو احكيك عليها

السطور ما تحتويها

والرؤى محتاره فيها

وانت شاعر

وف قياس الحس ماهر

..... و الكلام

ف الدرس واعر
بس روحك هيا روح
عائشه بتعبر تبوح
وانت فيك م السندباد
انك مغامر

(٨)

انا بكتب
ومش طامع
ولو عيني هتلقى عنيك
و ابات راع بحضن ايديك
دا حلم هروبي م الواقع
بنام ف الظل متغطي

واقول بختي
ولو ع الصبر متربي
بحصير جامع
بتغلي أرض من تحتي
ف ايدي جبل م الرحمة
وتتبخر دموعي غيم
يضم .. الضيم
على ضلوعي
تفيض الروح بتسبيحه
ويتنزل برد ربي
يطبطب والندا طالع

(٩)

اه هاتكلم

واهزم ضعفي

سيف الكلمة

زلزل حرفي

انا مش هاسكت

تاني وانا

شرط فروضي

اسمه قيام

لجل عنكي اشق الصف

أقف قدام

عاوز أبقى شهيد بهواكي وارفع سيف

قلمي و أوراقي

يتحنى الفجر بأشواقى

لضي شمسك

انا مش هاسمح

حد يدوسك

طول أنفاسى

يبلغ أملى

(١٠)

هاعيد الفكر م الأول

ومهما السجن هايطول

ف قلبى براح

ولو جنة اللي عايشينها

ما فيها روح بترتلنا

هاتبقى الثانية

ف مصيرنا بعمر جراح

وانا العابد

وانا الزاهد

وانا اللي مركبي تاهت

ف عرض البحر

انا معصور

سنين القهر

ولكن في حقيقة الأمر

مشاعري لسه ما شابت

بيأسرني أمل واحد

وبيه ارتاح

بناشد

قلب بستانى
وبطلب وعد
م الجانى
لو دمع الندى
جانى
هايحى الورد

تحدي

اللي شفته

من حناك واهتمامك

وانتي صابرة

.....والصبر

كان فوق احتمالك

بس دا عنوان جمالك

وانتي خابره

قالوا أم الدنيا هيا

وقال : دي قد الدنيا ديا

شايله حمل

وماشي بهيه

عمر ما نخت جمالك
انت كيفها لما تعطش
تجري وتشد المسير
مهما كان الريق بينشف
هيا تعرف
من وجعها
تبني
تتحدى المصير
هيا لو تنزف ضلوعها
لجل ماتخليك أمير
..... محتجالك
نبض قلبك أو شبابك
مهما تعمل هيا تستاهل كثير

روح الهوى

رفعت روح

الهوى ع الراس

طابت أوجاع

كل الناس

سحبت ايدها

اتنفض الماس

حرف بيوصف

لون ضحكتها

وحرف اتعجب

من طلتها
رمشت عينها
ف سحبة ايدها
داب القلب
من الإحساس

نبض الغرام

اتأخرت عن الميعاد

والوقت فات

فضلت أجري

وشوقي بيسبقتني

كل نقطه من جبيني

ترسم حنيني

وتصحي صوت الذكريات

كان أملى أشوفك

وهمس أنفاسي يحوشك

.....ماتسافرش

يا ريتنى دوبت على التراب

و لا اني افوتك

.....يا انا

هافضل هنا

ونبض قلبي بيناديك

وحبي أقوى م البعاد

بحر و قمر

انا والبحر و القمره

ابان مبسوط

لكن قلبي على جمرة

وليل بيغوت

فيوعدني بوصال بكرة

ولو هاستنى ميت بكرة

ماهوش بيعود

بس وعود على الذكرى

و وجدني ع الخيال مسنود

بتأخذي حنين فكره

بأن الحب جوايا

خلاص اتخطى أي حدود

معالي الروح

"إنما تأسى على الحب النساء"

وانا منهم

لكن بينهم

ووضعي

ما يشابههم

انا السحر اللي خاطفهم

ودافنة السر

ف المعجم

حروفه لما تترجم

تلاقيها

ف باب الروح

وحافرها الوجع ف اللوح

على صفحة حنين مجروح

انا روح.....كل النساء

انا الكلمة التي معناها

ا

ش

ت

ي

ا

ق

تفاصيل ف قمة الاحتياج

لمشاعرك المؤمنة

بعقيدة العشاق

وانت ربان السفينة

أما...أنا

موجه ومنبعها اعتلاء

حوريه و جايه م الجنة

وريحة البحر جوايا

ولون الورد تركيبة

حرير.....

بس ليه هيبة

حاجة معمولة بمزاج

يعني امتزاج

و بنعلم بنات حوا
وارش الأرض باللولي
تقاوي الحب تتقوى
و تتحنى.. عيونك ليل
و تستنى القمر بدليل
لو ان خلخال الجميل
على طرف الهوى بيميل
..... يهز الكون
غصون ترقص عليها الطير
ولحني..... غير
وله رنة
باوزع فل يا صبايا
ورقه م الندى الاخضر

و ظلتها كما السكر
تشوفها الدنيا بتسكر
بيان الويل
وانا المهرة الل مخلوقه
و مازعه القلب من جوه
انا.....انتوا
وانا هوه
ولو خلق الزمان
م الهوه
ميت هوه
هاخطي فوق حدود الصعب
.....واتروى
واناجي الرب

ينزل م البرد حبة
تطفي الحرب بضلوعي
وادوب من عصير نوعي
خمور للشرب حللها
بإسم الحب

الفهرس

الصفحة	عنوان النص	م
2	بطاقة الكتاب	#
3	اهداء	#
4	ليه	1
6	روح	2
8	لحن حزين	3
11	بصراحه	4
14	سنابل شوق	5
17	روح الحب	6
20	روح عاشقانى	7
22	الرحايا	8
24	روحك مش ممكن تلقانى	9
27	رغم كذبك	10
29	براءة	11
32	صباح سكر	12
33	تفاصيل الروايه	13
37	بقولها لك	14
40	حنين الروح	15

43	سرسبة أحلام	16
45	تفاصيل روح	17
49	عزف	18
51	كان لازم	19
54	سحقا لجنونك وجنونى	20
56	صوت الأمان	21
58	الموت حياه	22
59	الصبر	23
61	والله زمان	24
64	آاااااه يا أمى	25
68	وتبكى عينى	26
71	نغم	27
85	تحدى	28
87	روح الهوى	29
89	نبض الغرام	30
91	بحر وقمر	31
93	معالى الروح	32
98	الفهرس	33

